

**Qaffasinnerusumik ilinniartitaanerit pillugit
Inatsisartut inatsisaata allanngortinneqarnera pillugu
Inatsisartut inatsisaat
(Eqqumiitsuliornermik qaffasinnerusumik ilinniarfinni
ilinnialernissamut piumasaqaatit, ilinniarnermut
ileqqorissaarnermullu malittarisassat,
paasissutissanik nakkutilliineq pissarsiortarnerlu
aamma misileraalluni ineriartortitsinermillu
suliaqarneq)**

§ 1

Qaffasinnerusumik ilinniartitaanerit pillugit Inatsisartut inatsisaanni nr. 14, 12. juni 2019-imeersumi uku allanngortinneqarput:

1. § 1, imm. 2-mi oqaaseqatigiit siullit ima oqaasertalerneqarput:

” Qaffasinnerusumik ilinniagaq teorimut tunngasunik atuagarsornermillu annertunerusumik ilinniarfiuq, ilinnialerfigissagaanni ilinniarneretuunngorniarfimmi angusimanissaq piumasaqaataalluni, tassunga ilanggullugu ilinniarnertuunngorniarfimmi immikkut aaqqissuussamik ilinniagaq imaluunniit inuussutissarsiummut ilinniagaq, taamaattorli § 31 a tak.”

2. § 17 kingorna una ikkunneqassaaq:

”Ilinniarnermut ileqqorissaarnermullu malittarisassat

§ 17 a. Ilinniarfiup pisortaata ilinniarnermut ileqqorissaarnermullu malittarisassat aalajangersassavai, taamaattorli imm. 3 tak. Ilinniarfiup pisortaata ilinniarnermut ileqqorissaarnermullu malittarisassat ilinniartunut ilisimatitsissutigissavai. Ilinniarfimmi pisortap ilinniarnermut ileqqorissaarnermullu malittarisassat ilisimatitsissutitut Naalakkersuisunut nassiutissavai.

Imm. 2. Ilinniarfimmi pisortaq ilinniartunut ilinniarnermut ileqqorissaarnermullu malittarisassanik maleduaanngitsunut pineqaatissiinissaq pillugu aalajangiissaaq. Ilinniarfimmi pisortap ilinniartut, ilinniarnermut ileqqorissaarnermullu malittarisassanik arlaleriarlutik sakkortuumilluunniit unioqqutitsisut

anisissinnaavai.

Imm. 3. Naalakkersuisut ilinniarnermi pissuserissaarnissamillu malittarisassat pillugit malittarisassanik erseqqinnerusunik aalajangersaassapput, tamatumunnga ilanngullugit pinngitsoorani takkuttussaaneq aamma ilinniartunut ilinniarnermi pissuserissaarnissamilu malittarisassanik maleruaanngitsunut pineqaatissiisarnissat pillugit malittarisassat.”

3. § 20, imm. 3-mi oqaaseqatigiit siulliit ima oqaasertalerneqarput:

” Imm.1 malillugu qinnuteqaatinut ilinniakkamut ilinnialerfissatut qinnuteqarfisamut ingerlariaqqissutaasinnaasutut uppernarsaatit ilanngunneqassapput, taamaattorli § 31 a tak.”

4. § 31-p kingornagut kapitali 3-mi ikkunneqassaaq:

” § 31 a. Naalakkersuisut eqqumiitsuliornermik qaffasinnerusumik ilinniarfinni ilinniartussanik akuersinermut atatillugu ilinnialernissamut piumasaqaatinik saneqqutsisoqarnissaa akuerisinnaavaat.

Imm. 2. Naalakkersuisut qaffasinnerusumik ilinniarfinni ilinnialernissamut akuerisaanissamullu malittarisassanik erseqqinnerusunik aalajangersaasinnaapput.”

5. § 35 ima oqaasertalerneqassaaq:

” § 35. Naalakkersuisut qaffasinnerusumik ilinniarfinni akuerisaanissamut malittarisassanik erseqqinnerusunik aalajangersaasinnaapput.”

6. § 39-p kingornagut ilanngunneqarpoq:

”Paasissutissanik nakkutilliineq pissarsiortarnerlu

§ 39 a. Naalakkersuisut ilinniakkat ilinniartitsinerlu lnatsisartut inatsisaat manna malittarisassallu taanna malillugu aalajangersarneqartut naapertorlugit nakkutigissavaat.

§ 39 b. Naalakkersuisut ilinniarfik, ilinniakkamut qinnuteqartut sulisullu pillugit paasissutissat pisariallit tamaasa ilinniarfeqarfinit, qaffasinnerusumik ilinniakkanik neqerooruteqartunit piniarsinnaavaat, taamatuttaarlu nakkutilliinissaq kisitsisitigullu paasissutissanik suliaqarnissaq siunertaralugit ilinniarfeqarfinit alakkarsinnaapput matumunngalu malittarisassanik aalajangersaasinnaallutik.

Imm. 2. Tassunga atatillugu Naalakkersuisut ilinniarfeqarfillu qaffasinnerusumik ilinniakkanik neqerooruteqartut akornanni elektroniskiusumik attaveqatigiinneq, tessunga ilanngullugit paasissutissanik tunniussinermut atatillugu qanoq ittuunissaat ilusissaallu pillugit malittarisassanik Naalakkersuisut aalajangersaasinnaanissaannut tunngavissamik ilanngussisoqarsinnaassaaq. Aammattaaq Naalakkersuisut nakkutilliinissamut isumannaallisaanissamullu piumasaqaatinik aalajangersaasinnaapput.

Misileraalluni inerisaallunilu suliat

§ 39 c. Naalakkersuisut immikkut pisoqartillugu inatsit sanioqqussinnaavaat, tamanna misileraalluni sulinissap perorsaanikkullu inerisaanissap siuarsarnissaanik peqquteqarpas. Misileraalluni inerisaallunilu suliat ilinniartut ilinniakkaminnik inuussutissarsiummut ilinniakkamut, qaffasinnerusumik ilinniakkamut

akuerineqarnissamut periarfissaannik allatigulluunniit pisinnaatitaaffiinik ajornerulersitsinnginnissaat piumasaqaataavoq.

Imm. 2. Naalakkersuisut immikkorluinnaq ittunik pisoqartillugu ilinniartunut ataasiakkaanut tunngatillugu inatsit sanioqqussinnaavaat."

§ 2

Inatsisartut inatsisaat ulloq 1. januar 2022-mi atuutilissaaq.

Namminersorlutik Oqartussat, ulloq 1. december 2021

Múte Bourup Egede
Naalakkersuisut Siulittaasuat

Namminersorlutik Oqartussat
Imaneq 4
3900 Nuuk
E-mail: nsninatsit@nanoq.gl

Linkit iluaqutaasussat

Kalaallit Nunaanni inatsisinut nalunaarutit
Namminersorlutik Oqartussat inatsisinut toqqorsiviit
Naalakkersuisut